



PARTURENA PESTA PARJOLO PARNINGOTAN HATUTUBU NI TUHAN JESUS



Topik :
“HATUTUBU NI TUHAN JESUS”
(Lukas 2:1-7)

Kamis, 25 Desember 2025

Pangaradeon dohot Prosesi:

- *Prosesi masuk parhobas diiringi elekton/musik mangendehon BE. No. 57*
- *Prosesi angka parhalado ni huria, Dipagalak paragenda ma lilin naung diparade di langgatan. Sude ma Parhalado dohot Pandita jongjong di langgatan mandompakhon tu ruas ni Huria.*

1. PASAHAT TABE NATAL (L: Liturgis; R: Ruas)

Pdt : Huria ni Tuhanta, Na marpungu do hita di ari Pesta Natal on marlas ni roha manghamauliatehon balga ni asi ni roha ni Debata tu hita, marhite na marsuru AnakNa gabejolma tubu di Betlehem. Di bagasan las ni roha sisongon i, hupasahat hami ma tu hamu:

Pdt & Parhalado : **Selamat Ari Natal ma di hamu saluhutna.**

R : Selamat Ari Natal ma nang di hamu!

Pdt : Antong di bagasan unduk dohot serep ni roha, tapahibul ma rohanta marsaor dohot Tuhan na ro paluahon hita, marende ma hita!

(di tingki marende, mulak ma angka parhalado dohot Pandita tu hundulanna)

R : (Mangendehon) **BE. No. 57 : 1 – 2 “NUNGA JUMPANG MUSE ARI PESTA I” BL.202**

♪ *Nunga jumpang muse ari Pesta i, hatutubu ni Tuhanta Jesus i. Tuat do Ibana sian surgo i, mebat tu hita on.*

Reff: Hasangapon di Debata, dame, dame ma dijolma. Las ni roha ni Debata, hajolmaon muse.

♪ *Beta ale dongan tu Betlehem i. Itasomba dakdanak na disi. Na tinongos ni parasiroha i, Debata Ama i.*
Reff: Hasangapon di Debata....d.u..

---- Musik/organ ---- jongjong ----

♪ *Sombanami ma di Ho na tubu on, Ho si boan dame tu portibi on. Sai pasaorhon ma tu rohanami on, dameMi O Jesus.*
Reff: Hasangapon di Debata ...d.u.

2. VOTUM-INTROITUS-TANGIANG

L : Marhitehite Goar ni Debata Ama dohot Goar ni AnakNa Tuhan Jesus Kristus dohot goar ni Tondi Parbadia na tumompa langit dohot tano on, Amen. Dungi gabe daging ma Hata i, jala maringanan di tongatonga ni hita on, jadi huida hami ma hasangaponNa songon hasangapon ni Anak Sasada na sian Ama i, gok asi ni roha dohot hatutuon. Haleluya!

R : **(Mangendehon) Haleluya, Haleluya, Haleluya.**

L : **Martangiang ma hita !** Ale Tuhan Debata, Amanami na di banua ginjang. Mandok mauiate do hami tu Ho, ala ni godang ni asi dohot holong ni rohaM di hami; ai dibasabasahon Ho do AnakMu na sasada i tu hami na di pardangolan on, asa malua hami marhitehite Ibana sian dosa dohot sian hamatean saleleng ni lelengna. Hupangido hami tu Ho, sai sondangi ma rohanami na holom i marhitehite Tondi Parbadia i; angkup ni i sai parrohai ma hami, asa huboto hami mandok mauiate tu Ho, asa tarapul situtu rohanami di hagogotan dohot di pangunjunan, marhitehite AnakMu, Tuhan Jesus Kristus Tuhannami. Amen. (---
hundul---)

3. MARENDE BE. NO. 46:10-11 “NA SIAN GINJANG DO AU RO”

BL. 33

♫ *Jesus haholonganhi bongoti dohot rohangki. Pabali sian i sude na tau mangago au muse.*

♫ *Haleluya, Haleluya! Na ro tu hita Debata. Martua hita baenon nij, saleleng ni lelengna i.*

4. PATIK NI DEBATA

L : Tangihon hamu (Tatangihon)ma Patik ni Debata, ima na tarsurat di 1 Johannes 4: 7. “*Hamu angka haholongan, masihaholongan ma hita, ai sian Debata do haholongon i, jala ganup na marholong ni roha, i ma naung tubu sian Debata jala ditanda do Debata*”. Antong rap mangido gogo ma hita tu Debata, laho mangualahon PatikNa i.

R : *Ale Tuhan Debata, sai pargogoi ma hami mangualahon na hombar tu PatikMi. Amen.*

5. **MARENDE BE. NO. 686:1-2 “RAMUN DO AU” BL. 686**

♫ *Ramun do au di joloMi gok dosangki urasi au.
O Jesus Birubiru i dison do au patau ma au.*

-----**jongjong**-----

♫ *Na ro do au tu joloMi, gale do au urupi au.
O Jesus ala mudarMi dison do au patau ma au.*

6. **MANOPOTI DOSA :**

L : Tatopoti ma dosanta, **Martangiang ma hita.** Ale Tuhan Debata, Amanami na di banua ginjang. Ho do na patupahon hasesaan ni dosa di hami halak na dangol on marhitehite Anak haholongan ni rohaM. Sai asi ma rohaM di hami, angka na mangarsakhon dosanami. Sai sahapi ma tu bagasan rohanami hasesaan ni dosanami i. Lehon ma tu hami TondiM na badia i, asa unang ganggu rohanami di asi ni rohaM, alai asa hot rohanami marhaporseaon, laho manggotaphon nasa dosa dohot roha portibi on, asa hupasahat hami dirinami tu Ho, gabe pelean na mangolu jala na badia marhitehite Tuhan Jesus Kristus Tuhannami, Amen.

Bagabaga ni Debata taringot tu hasesaan ni dosa. Songon on do panghaholongi ni Debata di portibi on, pola do AnakNa na sasada i dilehon, asa unang mago ganup na porsea di Ibana, asa hangoluan na saleleng ni lelengna di ibana. **Hasangapon ma di Debata na di ginjang !**

L+R : Amen

----- **hundul** -----

7. **Marende BE. No. 610:1 “PASANGAP MA” BL. 610**

*Pasangap ma, pasangap ma Debatanta, Debatanta na di ginjang.
Dame ni Tuhan saor tu hita angka jolma halomoanNa. Pasangap ma
Debatanta, pasangap ma Debatam. Dame ni Tuhan saor tu hita
dame ni Tuhan saor tu hita angka jolma angka jolma halomoanNa,
angka jolma halomoanNa, halomoanNa. Amen, Amen.*

8. **Epistel :**

L : Hata ni Debata turpuk Epistel turpuk di Pesta Natal on ima na tarsurat di **Sakaria 9:9-10.** Mariaia situtu ma ho ale boru Sion, marolopolop ma ho ale boru Jerusalem! Ida ma, na ro ma rajam tumopot ho, partigor ibana jala siparmonang; na serep do rohana jala marsihundul di halode dohot di anak ni halode inaina.

R : **Jala Ahu maniaphon angka hureta sian Epraim dohot angka hoda sian Jerusalem, siap dohot sior tu hamusuon.**

L : **Dung i baritahononNa ma hadameon tu angka bangso parbegu, jala masuk tu gongomanNa sian laut tu laut, jala sian batang aek Euprat sahat ro di angka ujung ni tano on. Ima sahatna. Martua do angka na tumangihon Hata ni Debata jala na umpeopsa. Amen.**

9. Marende BE. No. 591:1-2 “BORU SION” BL. 591

♫ *Boru Sion las roham, las roham Jerusalem. Ai naung ro do Rajami padamehon ho tongtong. Boru Sion las roham, las roham Jerusalem.*

----- Jongjong -----

♫ *Anak Daud ro ma Ho, pasupasu bangsoMon. HarajaonMu hot tongtong, dame ma di tano on. Hosianna ro ma Ho pasupasu bangsoMon.*

10. Manghatindanghon Haporseaon:

L : Tahatindanghon ma haporseaonta i, songon na hinatindanghon ni donganta sahaporseaon di sandok portibi on, rap ma hita mandok:

S : Ahu porsea.....Amen **(hundul)**

11. Sunggul-Sunggul

12. PAPUNGU PELEAN HUHUT MARENDE BE. No. 62: 1...

“HALALAS NI ROHA GODANG” BL. 172

(Papungu Pelean la dohot Ib)

♫ *Halalas ni roha godang, na hubaritahon on
Nunga tubu Sipalua, di hita jolma on
Hasangapon di Debata, laos dame, dame, dame ma di jolma
Lomo ni roha ni Debata, do hita jolma on.*

♫ *Ai saborngin on do binsar, bintang di na holom i.
Sumondangi hagolapon na di rohanta i.
Hasangapon di Debata, laos dame, dame, dame ma di jolma
Lomo ni roha ni Debata, do hita jolma on.*

---Organ---

♫ *Tuhan Jesus hadomuan, na disuru Debata
Na pasaehon sude dosa di dolok Golgota*

*Hasangapon di Debata, laos dame, dame, dame ma di jolma
Lomo ni roha ni Debata, do hita jolma on.*

- ♫ *Sai sondangi ma rohangku, ale Tuhan Jesus i.
Asa dohot au maruli, di hatutubuMi
Hasangapon di Debata, laos dame, dame, dame ma di jolma
Lomo ni roha ni Debata, do hita jolma on.*

---Organ---

- ♫ *Halalas ni roha godang sai songgopi rohangkon
Asa dohot au ummalo mamuji goarMi
Hasangapon di Debata, laos dame, dame, dame ma di jolma
Lomo ni roha ni Debata, do hita jolma on.*

13. JAMITA: Lukas 2:1-7

14. PAPUNGU PELEAN HUHUT MARENDE BE. No. 615: 1 -- “TARBEGE SURUSURUAN MARENDE” (Pelean II)

- ♫ *Tarbege surusuruan, marendé mansai uli.
Angka dolok dohot rura, gok do saringar na i.
Sangap ma, sangap ma di Tuhan
sangap ma, sangap ma di Tuhan.*
- ♫ *Las roham ale parmahan, nunga tubu Kristus i
Rap marendé ma hamuna, pasangaphon Raja i.
Sangap ma.....*

---- organ ----

- ♫ *Borhat ma hamu marnida, tu huta Betlehem i,
Somba Kristus Sipalua, naimbaru tubu i.
Sangap ma.....*
- ♫ *Ida ma di panggagatan, Sipalua na ro i.
Sigomgomi parluhutan, langit dohot tano i.
Sangap ma.....*

15. ACARA MARULAON NA BADIA (Agenda HKBP)

BE. No. 152: 1 “Jesus Na Mamorsan” BL. 120

- ♫ *Jesus na mamorsan dosa ni portibi on, pangolu hami.
Jesus na marmorsan dosa ni portibi on, pangolu hami.
Jesus na mamorsan dosa ni portibi on, sai pasonang hami,
Amen, Amen, Amen.*

Agenda Ulaon Nabadia

BE. No. 153: 1 “O Jesus, Naung Sineat” BL. 126

- ♫ *Jesus, naung sineat, di hau na pinarsilang.
RohaM tongtong daulat, nang uju Ho tarhilang.
Marutang hosa hami, ditaon Ho dosanami, asi rohaM o Jesus.*

Ro ma tu jolo manjalo Parpadanan Na Badia (di na laho mulak tu hundulan, disi ma tapasahat pelean Ulaon Na Badia)

Angka ende di tingki manjalo Ulaon Na Badia tu jolo

BE. No. 155: 1- 3 “Tuson Ma Ho Ale Tondingku” BL.192

- ♫ *Tuson ma ho ale tondingku, di na mauas, male ho
Manjalo basa ni Tuhanmu pinaradeNa i di ho.
Dilehon Jesus do dagingNa, marhitehite roti on,
Dilehon dohot do mudarNa, marhitehite anggur on.*
- ♫ *Ai nang tongtong pe ganup ari, mudarNa mangurasi au.
Huhut Ibana so mansadi manogu tu lambungNa au.
Sai naeng au mangan parpadanan ni Jesus Kristus, Tuhanhi.
Na padamehon parbadaan, na pasonanghon rohangki.*

--- organ ---

- ♫ *Asi rohaM di au o Jesus, tumpahi au sadari on.
Ai hataMi do hupatulul, manganhon parpadanan on.
Antong patiur ma rohangku, marningot denggan ni basaM.
I ma na tinaonMi dosangu, binaen ni holong ni rohaM.*

BE. No. 86: 1- 3 “Silang Na Badia I” BL. 67

- ♫ *Silang na badia i, Ho do lombulombungki
Maralohon dosa i, dohot pandelea i
Di sude sitaonon i, Ho ma lombulombungki.*
- ♫ *Nasa na huula i, ndang tau hasonanganhi
Nang ringkot pe rohangki, pola ro nang ilungki
Holan asi ni rohaM, pangurupi o, Tuhan*

---- organ ----

- ♫ *Ro do au nuaeng tu Ho, sai palambas ma rohaM.
Nunga pola mate Ho, ala asi ni rohaM
Jangkong au na dangol on, sai ulosi tondingkon.*

BE. No.182: 1- 4 “Tu JoloM O Debatangku” BL.24

- ♫ *Tu joloM o Debatangku sai use do rohangkon
Sai pasiat tangianghu dohot iluilungkon*

---- organ ----

- ♫ *Husolsoli do rohangku na gok dosa i tongtong
Ai godang ariaringku na hubahen ambolong
---- organ ----*
- ♫ *Sai jotjot do hutadinghon dalamMi na tigor i
Kristen au, hape hutondong dalam hamagoan i.
---- organ ----*
- ♫ *Ala nii tungki rohangku jongjong di adopanMi
Sai asi rohaM Tuhanhu sesa nasa dosangki.*

BE. No. 452: 1 “Na Ro Pandaoni Bolon I” BL. 303

- ♫ *Na ro Pandaoni bolon i, i ma Tuhanta Jesus.
Didaoni na marsahit i hisar dibahen Jesus.
Reff: Uli ni barita i, las ni roha bolon i.
Sai dipuji rohangki, Jesus, Jesus, Jesus.
---- organ ----*
- ♫ *Tung sae dosa i sude, ai nunga mate Jesus.
Ndang jujuronNa i muse, parholong roha Jesus.
Reff: Uli ni barita i, las ni roha bolon i.
Sai dipuji rohangki, Jesus, Jesus, Jesus.*

BE. No. 466: 1- 5 “Nunga Ro Au” BL. 314

- ♫ *Nunga ro au, o Tuhanhu, tu hau pinarsilangMi.
Hupelehon ma diringku, upa halojaonMi.
Reff: Hatuaon i, las ni rohangki.
Ai hibul do hupelehon nasa diringki
---- organ ----*
- ♫ *Ndang adong naeng tioponhu saluhut tu tanganMi.
Maradian do tondingku di bagasan lomoMi.
Reff: Hatuaon i, las ni rohangki.
Ai hibul do hupelehon nasa diringki
---- organ ----*
- ♫ *Sai sahaphon tu tondingku, Tondi Porbadia i.
JoroMi ma baen rohangku, sai ingani diringki.
Reff: Hatuaon i, las ni rohangki.
Ai hibul do hupelehon nasa diringki
---- organ ----*
- ♫ *Sai gok Tondi ma rohangku, mate roha diri i.
Angka arta sian tano, ndang tusi be rohangki.
Reff: Hatuaon i, las ni rohangki.
Ai hibul do hupelehon nasa diringki
---- organ ----*
- ♫ *Nang gale dope rohangku, marsahala gogoMi.*

*HolongMi mangiringiring ganup langkalangkangki.
Reff: Hatuaon i, las ni rohangki.
Ai hibul do hupelehon nasa diringki*

BE. No. 476: 1- 4 “Ndada Ahu Guru Di Ahu” BL. 322

♫ *Ndada au guru di au be, Jesus do nampuna au.
Las rohangku dung hubege, Jesus Sipangolu au.
Reff: Ndang be au guru di au,
Jesus na humophop au, nampuna au.
Tung saleleng au mangolu, Jesus do nampuna au.*

---- organ ----

♫ *Ndang di au, di Tuhan Jesus, daging dohot rohangki.
Saluhutna hupasahat tu Ho, Jesus Tuhanhi.
Reff: Ndang be au guru di au,
Jesus na humophop au, nampuna au.
Tung saleleng au mangolu, Jesus do nampuna au.*

---- organ ----

♫ *Ulaonhu nang artangku pangke ma baen sangapMi.
Diusehon Ho mudarMu tung tanda do holongMi.
Reff: Ndang be au guru di au,
Jesus na humophop au, nampuna au.
Tung saleleng au mangolu, Jesus do nampuna au.*

Ende Pujipujian: BE No. 9: 1 “Hupuji Holong Ni RohaMu” (jongjong)

*Hupuji holong ni rohaMu, o Tuhan Jesus Rajangki
Tu Ho hulehon ma tondingku, ai ido pinangidoMi
Huhalupahon ma diringku, mamingkir holong ni rohaMu.*

TANGIANG Panutup-PASUPASU

Selamat Ari Natal